

## Aston

Mout m'entremis de chantar voluntiers  
e d'alegrans' e de joy mantener  
mentre que fuy d'amor en bon esper.  
Eras no·i vey mon pro ni lo·y enten,  
ni de midons mais secors non aten;  
tals desconortz e tals esmays m'en ve  
que per un pauc de tot joy no·m recre.

Gran mal mi fetz l'acuyndamens premiers  
e·l belh semblan que ges non eron ver,  
qu'anc pueys non puec mon coratge mover;  
qu'en un desir suy ades solamen  
que de ren als grans enveya no·m pren.  
E pus no·l platz que n'ai' autra merce,  
a sofrir m'er lo trebalh en que·m te.

Ja no parrai de lieys mos cossiriers;  
per mal que·m do non li puec mal voler,  
quar tant la fai sens e beltatz valer  
segon l'afan folly saviamen.  
Mal o ai dig, ans folly follamen,  
quar anc Narcis, qu'amet l'ombra de se,  
si be·s mori, no fo plus fols de me.

Atressi·m muer entre·ls loncs deziriers  
qi·m fan soven sospirar e doler  
per lieys qui m'a gitat a non caler  
e luenh d'esper m'a mes estranhamen,  
qu'esquivat m'a son privat parlamen.  
Et hieu am la tant, qu'a la mia fe,  
quan veg mon dan, ges mi meteys non cre.

Ben sai quals es totz mos cossalhs derriers.  
Pus del partir non ai ginh ni saber,  
ses son pezar, farai lo mieu plazer;  
amarai la midons per tal coven  
qu'el cor aurai l'amoros pessamen,  
mas la boca tenrai ades e fre.  
Aquilh sivals non l'en dira mais re!

Estarai donx cum lo penedensiers  
que re non quier d'quo que vol aver.

A! que·m tarda quar non la vau vezet!  
Irai lai doncs morir ad escien?  
Oc, qu'aital mort amarai eu soven,  
qu'estranchamen a gran plazer qui ve  
so qu'ama fort, ja non ai' autre be.

Lo vers tramet midons per tal coven  
qu'a tot lo menhs, s'autre pro no m'en ve,  
quan l'auzira, li membrara de me.

- letto 744 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropaea.let.uniroma1.it/?q=laboratorio/aston-18>